

# E nua ei la quarta strofa?

Dacuort ha la Chasa Editura Rumantscha publicau ina biografia varionta pil 150avel giubileum da Flurin Camathias. Dumengia sera ei stau la presentaziun ufficala ella baselgia da Laax.

AUGUSTIN BEELI/FMR

Gl'organist *Gion Balzer Casanova* ha introduciu cun in'ouvertura. El ha dau l'entschatta cun ina melodia arranschada aposta per la presentaziun dil cudisch. La gronda maioritad che ha priu plaz els bauns dalla baselgia da Laax ha enconuschiu la melodia che Hans Erni ha fatg tenor ils plaids da Flurin Camathias. Ch'il poet da Laax haveva fatg ina quarta strofa per «Fontaunas clar resunan» sa-vevan ils paucs.

## Da giudem ensi

Gl'oratur *Remo Arpagaus* ha fatg in pign examen culs presents. El ha dumandau sch'ils plaids «Cantond sco las fontaunas, jeu mon per cuolms e vals», s'audien tier la secunda ni tier la tiarza strofa. Ils biars ein stai dil meini ch'ei seigi la secunda. Lezza entscheiva denton culs plaids «Jeu sentel la fladada dil vent sedestadau». Cun quei exempel ha el vuliu dar ina survesta dallas treis strofes ch'ina poesia ha. Daco adina treis, e buca quater? Da giudem ensi, dalla tiara si en tschiel, hagian las poesias da Camathias sistem e seigien baghegiadas si aschia. Sia analisa ha gl'auditori capiu, ei ha dau enqual risada duront l'allocuziun dedicata al poet ed augsegner. «Nies bien Camathias ha buca fatg musica, el ha fatg texts», ha Remo Arpagaus puntuau en sia laudatio critic-analitica. Quels texts han ils cumponists romontschs dil 20avel tschentaner. En tut ha Flurin Camathias fatg varga 1000 poesias, da quellas han ins mess 400 en melodia.

In enorm diligent seigi el staus, han tuts involvai confirmau e l'analisa puntuescha quei. *Erwin Ardüser*, il president dalla Pro Laax, ha tratg els fils dil project

«Viva Flurin». Il cudisch «Fontaunas clar resunan» ei in dils elements dallas diversas commemoraziuns pil 150avel anniversari. Il project dil cudisch culla civi-arta melna da glin ha il comite confidau alla Chasa Editura Rumantscha. La menadra *Anita Capaul* ha realisau, en stretga collaboraziun culs da Laax, in concept

enrihont. Ils texts da sis auturas ed auturs, massa fotografias e reproducziuns da brevs personalas, denton era fotografias, ein in arcun d'informaziuns.

El chor dalla baselgia han Anita Capaul ed Erwin Ardüser presentau agl auditori ils divers auturs. Las fotografias da *Susanne Stauss* ein sapientivamein aschia.

Igl ei buca kitsch, folclora e tschiel blau, mobein impressiuns co nus vesein oz vitgs e cuntrada. *Theres Jörger* e *Marie Cuennet* ein responsablas pil concept grafic cun paginas che varieschan ellas colurs alv e violet. La bibliografia da *Renzo Caduff* maunca buc, en plirs documents san ins era famigliarisar culla scartira a maun

dil poet. «La musica romontscha duvrass puspei in Camathias», ha la musicologa *Laura Decurtins* manegiau.

**Il cudisch «Fontaunas clar resunan – 150 onns Flurin Camathias», edius dalla Chasa Editura Rumantscha, 220 paginas, en format grond e ligiaus en glin, san ins retrer ellas librarías. ISBN 978-3-905956-023-8.**



Il poet, circumdaus d'auturas e realisaders dil cudisch. Dretg en pei Anita Capaul, la menadra dalla Chasa Editura Rumantscha.

FOTO STEFANIE BLOCHWITZ

## Secund cudisch giubilar

1971 ha la vischnaunca da Laax dedicau a sur Flurin Camathias ina scartira giubilara da varga 400 paginas. 50 onns pli tard dat ei in niev cudisch festiv, propi tut in auter. Ella scartira s'avischinan pliras auturas ed auturs alla personalitad. Il cudisch cuntegn contribuziuns da *Remo Arpagaus*, *Bettina Berther*, *Sandro Buchli*, *Leonard Caduff*, *Laura Decurtins* ed *Ursicin G. G. Derungs*. Ina retscha da fotografias da *Susanne Stauss*, fatgas ad Andiastr, Breil, Laax e Siat e piazzadas all'entschatta ed alla fin dil cudisch, ensiaran ils 12 capetels. Ins legia tgunsch quellas contribuziuns cuortas e concisas, ins sa scuvierer «da niev» la personalitad Flurin Camathias. Ina cuorta resumaziun en tudestg cumpletescha mintga capetel. Ina seria da fotografias dils loghens nua ch'il poet ha viviu, fotografias ord siu album da famiglia sco era brevs ch'el ha scret e ch'el ha retschiert laian avischinari quei augsegner al pievel contemporan.